

Dat harr al Tradition ... Unner dat Dack an de Huuseck bode elke Jahr en Amselpaar sien Nüst. Sobold de Sünn in 't Vörjahr en Spierke warmer scheen, sach man de Swartschackers blot noch tosamen flegen. Dat sach alltied\* ut, as wenn se hör Bliedskupp över dat Enn van d' Winter wiesen wullen. Wenn se mööi\* wassen, satten se smaals\* up uns Pergola, stuuvt tegenöver van dat Dack, waar se alltied hör Nüst boden.

Later flogen se denn mit lüttje Tackjes\* un Moss\* in d' Snabel hen un her. Se kropen dör de Regengööt unner de Dackpannen. Daar was Bott för dat Nüst. Materiaal funn sük genoeg in d' Tuun. Dagenlang gung dat wieder, bit een van de beid Vögels verswunnen bleev. Dat Wievke harr Eier leggt un satt up dat Nüst to bröden. Dat Manntje harr dat nu drock. He muss för sük sülvst wat to Eten finnen un ok sien Frau versörger. Man of un to wull se ok sülvst up Tour, denn bleev he up dat Nüst sitten. De hele Dag gung dat hen un her. Um uns Tuun was en Wallheeg, daar gaff dat för de Vögels genug to finnen.

Man richtig drock harren de Vögelollern dat eerst, wenn de Lüttjen vandag kwemen. Eierschill\* lag denn unner. Een van de beid was smaals in dat Nüst an 't Foren\*, de anner unnerwegens up de Söök. De

hele Dag harren se dat drock. Ik kunn mi dat Spillwark van binnen bekieken, umdat se alltied eerst up de Pergola satten, bit dat de anner weer van dat Nüst wegfloog. In disse Tied hörde man de Amsels haast neet mehr singen. Blot of un to satt een boven up dat Huusdack un sung savends en Leed.

Man an een Dag harr en Eekster dat Nüst funnen. All lüttje Vögels harr he haalt un een van de Jungen lagg dood unner dat Nüst. Dat was nu leeg un de Ollern satten de token Dagen trüurig up de Pergola.

Enig Dagen later sach ik, dat een van de beid losfloog un mit en Snabel full Moss torüggkwamm. Dat Nüst wurr weer klaarmaakt, en tweede Maal Eier leggt un utbröddt, de Jungen grootfoort. Dit Maal gung alls good un de Truur weer vergeten. In dat Jahr hebb ik mi dübbelt freit, as de Lüttjen dat eerste Maal losflogen ... rut in de Welt un in dat Leven.

### **Vokabels:**

de Swartschacker = die Amsel

de Eekster = die Elster

alltied = immer

mööi = müde

smaals = in der Regel, normalerweise

Tackjes = kleine Zweige

dat Moss = das Moos

de Eierschill = die Eierschale

an 't Foren = am Füttern

de Truur = die Trauer